

Date	:	18 Jun 2016
Title	:	Kembara Saham Akhirat
Publication	:	Utusan Malaysia
Page	:	

Kembara Saham Akhirat

18 Jun 2016 4:00 PM



SEMPENA bulan Ramadan, Islamic Relief Malaysia (IRM) telah mengambil inisiatif murni dengan menganjurkan program Kembara Saham Akhirat bagi membantu golongan miskin dan kurang berkemampuan di Kampung Buluh Nipis, Muadzam Shah, Pahang.

Program pada Sabtu lalu itu telah mengumpulkan seramai 50 sukarelawan yang kebanyakannya terdiri daripada pelajar Universiti Tenaga Nasional, Muadzam Shah. Kesemua mereka turun padang mengendalikan aktiviti yang telah disusun atur.

Ketua Program, Noor Halimaton Saadiah Talib ketika dihubungi .com berkata, selain menjadi saluran untuk membantu golongan kurang bernasib baik, Kembara Saham Akhirat juga dilaksanakan sebagai platform untuk merapatkan silaturahmi antara penerima sumbangan dengan kakitangan IRM serta para sukarelawan.

“Penerima sumbangan kesemuanya adalah masyarakat Orang Asli daripada suku kaum Jakun yang tinggal di sini. Kami bukan sahaja sampaikan sumbangan, malah mahu mengenali dan merapatkan hubungan dengan mereka,” katanya.

Program bermula pada pukul 11 pagi itu telah dimeriahkan dengan aktiviti menarik, melibatkan penduduk sekitar dan sukarelawan. Noor Halimaton berkata, antara aktiviti utama adalah gotong-royong membersihkan surau dan kawasan dewan.

“Selepas itu, sukarelawan dan penduduk kampung bergotong royong menyediakan juadah berbuka. Pada masa sama, turut dianjurkan adalah sesi psikologi sosial melibatkan kanak-kanak dengan beberapa sukarelawan.

“Program turut dimanfaatkan dengan beberapa aktiviti santapan jiwa seperti tazkirah pendek. Selain itu, solat tarawih turut diadakan,” ujarnya.



NEWSPAPER CLIPPING

Date	:	18 Jun 2016
Title	:	Kembara Saham Akhirat
Publication	:	Utusan Malaysia
Page	:	

Dalam program itu juga, seramai 101 keluarga menerima sumbangan keperluan harian bernilai RM130. Antara barangan yang disumbangkan adalah beras, minyak masak, makanan dalam tin, tepung, gula dan garam.

Dalam pada itu, Noor Halimaton berpendapat, sokongan golongan muda yang menjadi sukarelawan amat menggalakkan.

“Ini adalah salah satu langkah pendedahan awal kepada sukarelawan terlibat. Mereka bukan sahaja dapat membuat amal kebajikan, malah mengumpul pengalaman untuk kegunaan masa hadapan.

“Mereka dapat muhasabah diri dengan melihat sendiri kepayahan ditempuhi golongan kurang bernasib baik khususnya masyarakat Orang Asli. Mereka juga boleh belajar cara hidup dan merapatkan silaturahim sesama Islam,” tambahnya.

Bagi orang ramai yang ingin mendaftar sebagai sukarelawan atau memberi sumbangan untuk disalurkan menerusi program ini, boleh berkunjung ke laman Facebook rasmi IRM untuk maklumat lanjut.

- AL FAIZAL/ IRM